



partii naleraq

UPA2016/99

Nunatsinni aatsitassat uran-imik akullit aamma qinngornernik ulorianartunik akullit allat piarneqalissagaluarpata aatsitassat sinnikuinik mingunnaqisunik nunatsinni eqqaaveqartinneqarsinnaanerisa inerteqqutaalersinnissaat siunertaralugu Naalakkersuisut suliniuteqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit Ataqtigiit)

Aqqaluaq B. Egede, Inuit Ataqtigiit siunnersuutaanut qujaatigaluta imatut oqaaseqarfiggissavarput.

Pisarnerput malillugu urani pillugu oqaaseqaraangatta aallarniutigisartagarput uani uteqqillara – Partii Naleraq uranimut naaggaartuuvoq.

Taamaattumik aamma uranimut sulluunniit tunngassuteqartut nunannguatsinni naaggaarpagut, eqqagassartaat ilanngullugit.

Qinngornerit ulorianartut, taaneqartarneratuut ersereerpoq immikkut sammisariaqartuusut, soorlu aamma aatsitassarsiariniaraanni Naalagaaffiit Peqatigiit piunnaqataat assigiinngitsut nuna aatsitassarsiorfinngortussani atuuttussanngortinneqartartut. Qinngornerit ulorianartut mingui takuneqarsinnaanngillat, ulorianassusaat ukiuni 100.000 sinnerujussuarlugit ulorianassusaataa affaannangoriartortarpoq, allatut oqaatigalugu nungukkiartornera arriitsuararsuusarpoq, taamaasillunilu sunniutissai toqunartut kinguariinnut tulleriaanut sunniuteqapiluttussaasarlutik. Aatsitassat qallorneqareeraangata qaarsup sinnikui aammalu immikkoortinneqarnerani toqunartut atorneqartut sakkortuupilussuarmik mingutitsisuupput. Aatsitassarsiornermi sumiluunniit takornartaanngilaq – tailings-it, tassa sinnikut igitassat qanittuanut iginneqartartut, assersuutigalugulu Kuannersuarni paaasoqalissangaluarpat pilersaarutaavoq sapsuoriarluni tatsip qanittuaniittumut iginneqartarnissaat. Sapsuortussanngortitap tutsiuginassusaa annertuumik apeqquuserneqartariaqarnerata saniatigut ilisimaneqarluarpoq Narsami anori nigeq sakkortuupilussuusinnaasartoq suna tamaat perserinnangortarlugu, taamaattumillu aamma aatsitassarsiornermi inatsimmi allaqqasoq, inunnut uumasunut pinggortitamullu mingutitsinnginnissaanik piunnaqarnerup innarleruminartorujussuunissaa takorloorneqalereersinnaalluni.

Naggataatigut assersuutit taatigu Maarmorilimmi matoreernerata kingorna eqqaata imartaa qanoq mingutsinneqartigisimanerata kinguneranik ukiorpassuarni aalisakkat assigiinngitsut

nereqqusaanngilluinnarnerat toqunartoqarpallaarnerat pissutigalugu, aali aqerloq, uranimit ulorianannginneq uani pineqartoq.

Taamaattumik uagut tungitsinniit naaggaartooreeluta siunnersuutip siunertaa paasilluarlugu eqqagassanik inerteqquteqarnissaq tamakkiisumik taperserparput, ataatsimiititaliamullu aappassaaniinnginnermi sukumiisumik suliarineqarnissaa innersuussutigalugu

Qujanaq.